



ԱՐՑԱԽԻ ԹԵՄ ԿԱՏԱՐԱԾ ՄԵՐ ՀԱՅՐԱՊԵՏԱԿԱՆ
ԱՅՅԵԼՈՒԹԻՒՆԻՑ ՅԵՏՈՅ ՄԵՐ ԱՂՈԹՔՆ ԵՆՔ
ՎԵՐԱՌԱՔՈՒՄ ԱՌ ԱՍՏՈՒԱԾ ԵՒ ՀԱՅՅՈՒՄ

Բարերար եւ բազումողորմ Աստուած, ի խորոց սրտի աղերսում եմ Քեզ, որ հայրախնամ սիրոյդ ճառագայթները միշտ ափռես Արցախ աշխարհի եւ Արցախցի ժողովրդի վրայ: Օրհնիր անմեռ յիշատակը նրանց նախորդ սերունդների, որոնք դարեր շարունակ իրենց կեանքն ապրեցին միշտ հաղորդ լինելով ընդ Քեզ՝ իրենց լեռների ու դաշտերի, իրենց եկեղեցիների ու վանքերի, իրենց կրթական շարկերի եւ դպրութեան օջախների մէջ:

Արդարութեան Արեգակի՝ Քո Միածին Որդւոյդ եւ մեր Տիրոջ Յիսուսի Քրիստոսի յոյսը արեւի յոյսին պէս թող մշտապայծառ շողայ ապրողների կեանքում: Տե՛ս, լեռներն ու դաշտերը կանաչել են, Քո շնորհած կեանքի տրուին ուժեղացել է, յոյսի շողը առատացել, հաւատքի գօրութիւնը աճել եւ սերն ամենուր սփռուել:

Թող ի սպառ դադարի պատերազմը. թող տիրեն սերն ու խաղաղութիւնը, հաշտութիւնն ու բարօրութիւնը:

Տուր Քո անսպառ գօրութիւնը, որպէսզի կարողանան ստեղծագործական կեանքով առատացնել Քո շնորհներն ու բարիքները Արցախում:

Քաջութեան ու առաքինութեան շնորհներով օծուիր Քո զաւակներին, որոնք ի գին իրենց արեան պաշտպանում են իրենց հայրենի աշխարհն ու ժողովուրդը: Բուժիր վերքերը վիրաւորներին, առողջութիւն պարգեւիր հիւանդներին, յոյս ներշնչիր լքեալներին, օրհնիր վաստակը աշխատողներին, զի տացեն պտուղ «ընդ միոյ երեսուն, ընդ միոյ վաթսուն եւ ընդ միոյ հարիւր»:

Եկեղեցւոյդ սպասաւորներին, պետական ու քաղաքային իշխանութիւններին, հասարակական, բարեսիրական եւ մշակութային կազմակերպութիւններին, յատկապէս մատղաշ դպրոցական երեխաներին, պարգեւիր Քո ամենախնամ իմաստութիւնն ու սէրը վասն փառացն քոց, վասն շինութեան եկեղեցւոյդ եւ վասն բարեկարգ պահպանութեան եւ շտաջագնաց կենաց Արցախու թեմիդ. Ամէն:

ԳԱՐԵԳԻՆ Ա

ԿԱԹՈՂԻԿՈՍ ԱՄԵՆԱՅՆ ՀԱՅՈՑ

Ս. Էջմիածին,

31 մայիս 1995 թ.